

ESTD. JULY 1931

Postal Regd. No. MR NE- 1063/2009-11



SIPAI TLANGAU


SIPAI PAWL THUCHAH LEH RAWNGBAWLNA

'I din leh ang u'

Nehemia 2:17

REGD. NO. RN 37326/81 VOLUME 80 NO. 4

A pril 2011



LUNGPHO



THE SALVATION ARMY

WILLIAM BOOTH - Founder
SHAW CLIFTON - General
International Headquarters
101 Queen Victoria Street
London EC4V 4EH
COLONEL. LALNGAIHAWMI
Territorial Commander

A MAN Rs. 6

SIPAI TLANGAU

Official Organ of
The Salvation Army, India Eastern Territory
(Regd. No. RN 37326/81)

APRIL - 2011

Volume 80 No. 4

Published by The Salvation Army
Territorial Headquarters Post Box - 5, Aizawl
796 001, Mizoram and printed at The Salvation
Army Centenary Press Tuikual 'S' Post Box - 5,
Aizawl 796 001 Mizoram Copy 5000
Editor - Major Chawnghluna

A CHHUNGA THU AWMTE

1. Editorial: Inralna pangpar
2. General Easter Message.....1
3. Chief Secretary Notes.....2
4. Bingbilet rawngbawlna.....3
Lt. Col. Lalramliana
5. Tui baptisma hi a tangkai em?.....5
Maj. Hrangngura
6. I din leh ang u.....6
Maj. K. Lalrinawma
7. Kum za lamtluang thlirna.....7
RHC Lalliansanga
8. Remna Sipai.....8
H. Zadinga
9. Lawmthu sawina.....9
10. Chanchin lawrkhawmte.....10
11. Home for the blind report.....12
12. Ropuinaa kaisangte.....13
13. Central 'N' 2010 SD result.....16

MISSION STATEMENT

CHHANDAMNA SIPAI PAWL hi Kristian kohhran, khawvel huapa Chanchin tha hrila thawk a ni.

A thuchah chu Bible ah a innghat a. A rawngbawlna chu Pathian hmangaihna a tihnun a ni. A hnapui ber chu Chanchin tha hril leh hleih nei hauh lova, Isua Krista hminga mihring mamawh phuhruk hi a ni.

editorial :

INRALNA PANGPAR



Tunlai hian mitthi ral nan pangpar hi kan hmang lar ta hle a. Ram changkang zawk te tih dan kan entawn pawh a ni mai thei e. Keini Salvation Army te pawh hian kan dan bu ah in ziak chu awm chiahlo mahsela, pangpar hi kan hmang uar ve ta khawp mai. Eizawanna atan pangpar lem siam chawp zuar te kan lo awm chinah phei chuan kan hmang uar leh zual a. Hetiang pangpar lem hian keimahni ah hmun a luah thuk ta viau a ni ang, kan Biakin chhung hmun pawimawh lai tak tak te pawh a luah deuh vek tawh a, Sipai te erawh chu kan pangpar lem khawp ang, a tak aia nalh zawk mah, a tak nisilo ang hi chu nih loh hram i tum ang u.

Hetianga mitthi ralna atan pangpar kan hman hi a that viau laiin kan economic dinhmun mila kan hman thiam erawh chu a tul khawp ang. Pangpar hi mi challang leh mi rethei in thliarna a ni thei a, mi hausa leh challang te ruang chungah pangpar a vum thur laiin mi harsa leh rethei zawk te kuang chungah chuan khawhar hmel takin pangpar pahnih khat hi a let ngat thung a. Kan hriat hauh lohvin pangpar hi mi rethei leh hausa thliar nan kan lo hmang reng mai a lo ni. 'Mirethei zawk te ruang chungah pangpar i dah uar zawk ang u' han ti dawn ila, an mamawh zawk chu pawisa a ni si a. Pangpar chu han zuar in sum chantir han tum leh dawn sela a tih chi der silo.

Mi challang zawk leh hausa zawk te tan inralna pangpar hi a hlut hle laiin dah zui dan tur a bangbo thlak hle a. Phum tel a rem silo, dah that dawnin a tam tham si, han tar reng dawn se a ni baw k silo, paih ngawt chi a ni baw k silo. A dawngtute tan pawh buaipui zui ngai tak a ni. A rei hnuah phei chuan hnawksak mai ah a chang thei. **Hetiang hi a nih avangin pangpar man a kan sen zat hi a pawisa in pe ta vek zawk ila, chhiat taw k chhungkua te sum senral tam tak chhawk zangkhai tu a nih zawk a rinawm.** Pangpar a kan hming chuang kher duhna avang a pe kan nilo baw k a. Mitthi chhungte harsatna chhawk zangkhai kha kan ngaihtuah ber tur a ni.

Pangpar hi kan hmang duh a nih pawhin siam chawp nilo, pangpar tak ngei hi ruang cheimawi nan hmang ila, thlan ah hnutchhiah leh mai ila. Chumi avang chuan pawisa a inral thulh chuang lo ila. Chu chu kan thatpui zawk in a rinawm. **Pawisa a inral hi i ching thar zawk ang u.**

2011 GENERAL EASTER THUCHAH

HAWIHHAWM TAKA RING TURA SAWMNA

Hun rawn in thlakthleng pangngai ang ringawt a nilova. Tun hma atang tawhin Thawhleha thu hian mi tam tak te rilru a lo khawih tawh thin a. Chu chuan hmuh theihin kan nunah danglamna min rawn thlen tawh thin bawk. Lalpa chuan a thu te chu khawngaihna mak leh danglam tak a ni tiin min lo zirtir tawh a. A chhan chu engpawhnise, Thoma'n Isua chu a tholeh ngei tih a finfiah dan kha kan tan pawh a tifiaktu tha tak a ni.



Mi tam takin “Ringhleltu Thoma” tiin an vuah a. Bible in min hrilh dan chuan Isua lokal lai hian Thoma chu zirtir dangte zingah a awm ve lova, mahse hmanhmawh takin chu chan chin chu an hrilh a.”Lalpa chu ka hmu ta” tiin an lo sawi a. Tichuan a chhanna langsar tak chu, “ *A kut a thirkhenna hnuhmate kha ka hmuh a, thirkhenna hnuhma ah te chuan ka kut zungtang ka zen luh a, a naka ka kut ka zen ngei loh chuan ka awih lovang*” a ti a. ‘Hmuh avanga ring’ Thoma hian a ti dik em?

Karkhat hnuah chuan a zirtirte zingah Isua chu a rawn inlar leh a, hemi hun hi chuan Thoma pawh an zingah a awm ve a. An zavaia chibai a buk zawh chuan ; “*In chungah thlamuanna awm rawhse,*” a ti a. Thoma hnenah chuan, “ *I kut zungin han khawih la, ka kutte pawh en rawh; I kut han ban la, ka nakah zen rawh; Ringlovin awm suh la, ring rawh,*” He Isua tawngkam thu hi kan Bible ah hian chhinchhiahna bik siam leh hawrawppuia emaw pawha ziah a nilo. Engemaw chang chuan zirtirte pawh hi Lalpa laka an thinrimna leh an paukhauhna te pawh chhiar tur a awm ve bawk.

Hawihhawm taka kan thlarau lam tana sawmna a ni tiin i ngaihtuah ngai em? Khami ni pawh khan a bik takin Isua chu Thoma hnenah a inlar a ni.

Tholeh Lalpa chuan a zirtirte rilru chu a hria a. Thoma chuan Isua chu mimal taka hmachhawn a, thian ang a lo hmelhriat a duh a. A hrehawm tawrhate chu a hlutsakin a hriatpui a. Tihtheihloh reng reng a neih a ringlo. Isua thiltihmak te hriatpuitu a nih bakah thildang a tihmak leh zel tur pawh hmuh zel tum tu a ni a. Mahse atan chuan khenbeh a nih hnu a Thawhleha erawh hi chu a beiseina piahlam thil a ni.

He thil thleng hian Thoma chu a tihrilhai lovin, mipui leh thiante hma ah pawh zahna a thlen lo a ni mai thei e. Isua hian midangte hmaah a hailang duhlovin, “Ringhleltu Thoma” an tih pawhin, chutiang zawnga ngaihtuah lo turin a hrilh a. Thoma hian Isua hi sawmin, Isuan a hliam te chu a silfai a, Pathian thuin a chhungkhat zawk a ni. Pathian thu in min hrilh bak pelhloh hi a dik ber a. Mahse Isuan min ngaihsak dan erawh chu kan chhiar in kan hre thei a ni. Isua chu engtiang taka khawngaihtu ropui nge a nih tih hre chungin kan chan chin angin Thoma chan chin pawh kan hre thei a ni. Engtinngge miten Isua an lo hriat dan leh an hlimpui dan kan hriat theih ang? Mite hruaia hneh tur a engmah tih nei silova, rinhlelna thu sawi leh ngawih reng te hi kan tih tur a nilo. Isua chu tupawh amah hriat duh tak tak tute tana lokal a ni. A nung a ni tih chiang taka hriatna min pe a. Amah chu a nung a, Mihring tak a ni bawk.

Thoma chhanna ang hian keini pawh kan chiang in, “*Kan Lalpa leh kan Pathian a ni,*” Kan Lalpa leh kan chhandamtu ropui chu a va ni tak em!

- General Linda Bond

CHIEF SECRETARY NOTES

Territorial Commander : Colonel Lalngaihawmi chuan February thla tir lam khan Training College tlawhin Cadet-ho te leh thawktute nen hun hlu tak an hmang ho va, Colonel hian Cadet-te hnenah Lecture benglut tak a pek bakah hmun hma enfelna a nei bawk.

Ropuina ramah : Major Bualkungpuia, Commanding Officer – Lungpho Corps chuan 6th Feb, 2011 zanlaih natlawk pawh awm lovin vankohna min chhansan ta a, Major vuina hun hmang tur hian Major Lalhmingliana, DC Central South Division leh Staff Officer te an kal a, vuina hun ropui tak leh hlawk tak Pathian kaihhruaina in an han nei. Major Biaklawmi w/o Major Bualkungpuia leh a fate tan kan tawngtai a ni.

International Leaders : Commissioner Lalkiamlova IS leh Commissioner Lalhlimpuii ZSWM te chu tun February thla chhung chawh la in London atangin Aizawl-ah an lo haw a, an chawh chhung hian Corps hrang hrangah rawngbawlna nung tak tak te an kaihruaiin, Territorial Home League Congress-ah khuallian niin thusawitu an ni a, an chungah kan lawm tak zet a ni. Chawh hun hlimawm tak an tu leh fate nen an neih kan duhsak a March, 2011 tirah IHQ-London panin an kir leh ang.

Chief Secretary : Lt.Colonel Lalramhluna chu Jampui Tripura a YMA dintu a nih avangin tun lawka Tripura Group YMA ten Conference an buatsaih ah “Khuai sawm bik” nihna pe a an sawm angina Behliangchhip ah a kal a. Colonel hi a nupui Lt.Colonel Kawlramthangi TSWM leh Major Laithanmawia PRS te nupa in an tawiwam bawk. Colonel hian Blue Mount School ama ho ngeia kum 25 lai kalta a din, tuna lo hlawhtling ta em em mai chu a tlawh bawk a, Managing Board member-ten lo lawmin tukthuan an lo buatsaih sak bawk.

Vankohna chhang : Major Hrangngura, Executive Officer nia kan Territory-a mawhphurhna pawimawh tak mai chelhtu chuan natlawk pawh awm lovin Ni 15th Feb, 2011 khan Territorial Council-a a tel hnu in tlaiah Lungphuchawl in vankohna min chhansan ta, kan ui hle mai. A vuina ah hian khawpui chung Corps

sipai tam tak leh thian thate nen Aizawl Temple Corps-ah vuina hun ropui tak neih a ni a. Chief Secretary-in he hun hi kaihruaiin Territorial Commander-in thlamuanna thuchah a sawi a, Territorial Staff Band leh Songster-ten thlahna ropui takah hian hneh takin hun an nei bawk.

Major Hrangngura hriatrengha Inkhawm hi Ni 20th Feb, 2011 khan Aizawl Temple Corps-ah neih a ni a, Major Romawia Bialtu CO in hun kaihruaiin Chief Secretary in thuchah a sawi a Biak In a lenglo sipaite he hunah hian an pungkawm a ni. A kalsan a nupui Major Biaksailovi leh a tu leh fate tan kan tawngtai a ni.

Spiritual Day : Lt.Colonel Lalramhluna, CS leh Lt. Colonel Kawlramthangi TSWM-te chuan Ni 21st Feb, 2011 khan Officers Training College Kolasib-ah Cadet-te Spiritual Day hlawhtling takin an hmanpui a, Integrated School an tlawh nghal bawk.

Personnel Secretary : Major Thanhlira PS chuan Ni 20th Feb, 2011 khan vankohna chhang ta Major Bualkungpuia CO Lungpho Corps hriatrengha inkhawm neihpui turin THQ aiawhin a kal a, Major Chawnghluna leh Major Lalhriatpuia ten an han tawiwam a, hun hlawk takin an hmang.

Territorial Home League Congress : Aizawl Temple Corps-ah Territory pum huap Home League Congress neih a ni a, palai thahnem tak Mizoram chhung leh pawn atangin an lokal a, Pathian thu tha tak tak nung tak ngaihthlak a nih bakah items chi hrang hrang benglut tak takte ngaihthlak a ni in, palai lokal ten an hlawkpui hle a ni.

2011/2012 Budget Session : Territorial hruiute leh Territorial Council member-ten ni hnih chhung Territorial Budget sawihona hun hlimawm tak an nei a, sipaite inpekna leh thahnemngaihna avanga budget lo pung zual zel avangin kan lawm tak zet zet a ni.

Ngaihtuah tur : “Rorelna a mi zah zawng neih hi a tha lo a ni” Thufingte 24:23

Lt.Colonel Lalramhluna
Chief Secretary

BINGBILET RAWNGBAWLNA



- Lt Col Lalramliana

I Korinth 12:5-11 ah chuan Paula'n rawngbawl dan hrang hrangte, hnathawh dan hrang hrangte a awm thu leh chungte chu Pathian pakhata chhuak an nih thu a sawi a; Thlarau thiloek chi hrang tam tak a awm thu leh chung thilpek te chu Thlarau pakhata chhuak an nih vek thu min hrilh a, heng rawngbawl dan hrang hrangte leh Thlarau thilpek hrang hrang te hi sawt tlan nana Pathian hnathawh a nih thu a sawi bawk. Tawngtai dan ringawt pawh hi ngawi renga a tawngtai te, thingthia tawngtai te, bawkkhupa tawngtai te, ding chung a ring thaka tawngtai te leh thu hmanga tawngtai te a awm a, heng ho pawh hi tih dan danglam a awm thei ngei ang.

Thusawi dan pawh chi hrang hrang a awm thei a, che chang mang lova sawi mial mial te, ring taka action nena sawi piap piap te, mi tuin emaw a thusawi laia kut ben a chin avanga ben ve tak ringawt te pawh a awm thei bawk ang. Engpawh nise, thusawi dan leh rawngbawl dan chi hrang hrangte hi Thlarau lama min tithang liantu leh rawngbawlna kawnga malsawmna min thlentu a nih pawt chuan a tha vek mai. Tawngkam pawh hi hman rim bik neih a awl hle a, thenkhatin 'var pawh' an uar laiin, hlawm dangte chuan an hmang ngai lem lo thung. Mizote hi Pathian thu aia thusawi pawimawh zawk, Pathian thu tak lawm aia hmel thar lawm mi kan niin a lang a, hetiang rilru hi kan put thin avangin thlarauva nun ngeth neia thanlen hi kan harsat ni pawhin a ngaih theih hial awm e.

Taksa sawizawina : June 1st 1987 khan Khawruhlian Corps-a pa Denga CSM (R) lung phunin Darlawn DHQ atangin kan kal a, Brig. Ngurliana (R) leh thian thenkhat Aizawl atangin an lo kal a, zingkarah lungphun hawnna neiin hunserh thlanmualah ka hmanga, mi kan thahnem hle. Chhunah chuan inah lenkhawm a ni

a, Pa Denga kha a bikin sipaite chuan kan ngaisang em em thin a, tui taka zai pawh kan tum tlang hle. Kan tum ulh nge ni, kan zai tui thei hauh lo mai a, nu pakhat ka hriat ngai loh chuanthahnem a lo ngai ve hle ni tur a ni, engmah sawi lovin hmun awl laiah vawi thum a rawn bingbilet zak zak mai a, hla rawn thlang a kan zai tuita em em mai a, boruak a keng tha hlein ka hria.

Hman kum khan Salem Corps-in Krismas hmang turin min sawm a, inkhawm ban chuan Y.P hall-ah kan lenkhawm a, zai a sak hle a, a beidawn thlak hle. Thawh-leh-khatah R. Saptawna CSM chu a tho thut a, a per kual tatawk tawh mai a, chuta tang chuan kan zai tui hle mai bawk a, Pathian tana taksa sawizawin hian awmzia a hei hle a ni. April 2001 khan Down Town Hospital, Guwahati-ah ka awm a, BP sang leh diabetes ziakna booklet min pe a, BP leh zunthlum enkawlna atana an ngaih pawimawh pathum te chu (1) Exercise (2) balance Diet (3) Medicine. Damdawi chu a hnuhnung berah zu dah tlat a!

Paula chuan inthawina nung leh thianghlim siam turin taksa pathian hnena hlan chu Kristian te rawngbawlna tur a nih thu ching takin a sawi (Rom 12:1). Thuhritu tam takin taksa thiltihin awmzia engmah nei pha lova an sawi laiin, Paula chuan Thlarau leh thinlung chauh Pathian hnena hlan turin a ti lova, Isua'n a taksa ngei min pe ang a, kan taksa a hnena hlan ve pahl turinmin hrilh a ni.

Paula'n taksa a sawizawin : Paula chuan mahni in hneh chu Kristian nun lan chhuah nan a pawimawh tih hriain, boruak chauh hnek lova, a taksa ngei a hnek thin thu a sawi (I Kor. 9:26). Heta hnek tih hi 'fight' a ni a, sual emaw, bei emaw tihna a ni, Paula chuan a taksa

pengte cchuan sualah a hruai lut thin tih chiang takin a hria (Rom 7:23). A taksa pengte chu thunun zawh loh chuan a mah ngei pawh paih thlak in a awm thei dawn a ni tih a hriain, "Chuvang chuan ka taksa ka tichhel a, ka thuhnuai ah ka dah tawh a ni, chutilochuan midangte hnena ka tlangaupui hnu pawhin eng emaw tiin keimah ngei hi paih thlak in ka awm dak a nge" (I Kor. 9:27) tiin a sawi ta a ni.

Paula chuan taksa thiltih ngaihne pna leh inthununna tel lova rawngbawlna hian thlarau nuna puitlinna kawng a dal a, hnu lama hawikir a awl em em a ni tih chiang taka a hrait avangin, taksa peng hrang hrangte chu felna bawih, felna rawngbawltu, Krista Mo thianghlim ni turin a duh a ni. Amah ngei chu kohhran ho entawna insiamin "Mi zirtute ni rawh u, keipawh Krista zirtu ka ni ang bawh hian" (I Kor. 11:1) a ti a ni.

Rawngbawlna Bingbilet : Thuhritute hi kan fimkhur a tul hle. Kan thusawi dan tam tak te hi chu ama that thata a tha, zawmpui nghet tha nei lem lo pangpar lem mawi tak ang mai ni te hian a ngaih theih. Awmzia tak tak nei lo, han zir zui dawn tak tak phei chuan thu bingbilet awmze thui tak nei lem lo, thawm na tak, pulpit hmaa ningbilet ho tawp ruala tawp ve mai thin a ang hle. Rinna thiltih awmzia te, dan thiltih leh rinna dan awmze dawnglamna te ngaihtuah ngun chung a pathian thu kan sawi loh chuan piangthar da kan tam tawlh tawlh ang a, kan hmanraw tangkai tak camping-te hi Pathian thu hmanga setana a din channa hmunah a chang mai ang tih te hi ngaihtuah peih a hun tak meuh a ni. kawng zua nuam tak, tawp leh thut thin sial kan thiam hle a ni; kan thu ngaithlatu ten hlim takin an hna zawha, kal zelna tur a awm loh avangin, hnu lamah an kir leh mai thin niin a lang. Hei hian thlarau lama than lenna leh Kristian nun puitling nei turin

harsatna a siam thin a ni.

Nun Bingbilet : Pathian mite leh rawngbawlna tute nihna pawimawh tak chu nun danglam, nu inthlakthleng, nun bingbilet hi a ni. Paula chuan "Taksa sawizawina hi sawt zawng a sawt ve bawh a; pathian ngaihsakna erawh hi chuanin nunna tuna awm sa leh a awm tur pek tiamna a nei avangin kawng tinrengah a sawt a ni" (I Tim. 4:8) a ti a ni. Englai pawha min hre rengtu leh ngaihsaktu hre renga zui zel hi a tawp thlenga rinawmna nun, chawimawina dawng tu nun chu a ni, Bibleh ah chuan, "Thih thlengin rinawmin lo awm rawh, tichuan nunna lallukhum ka pe ang che" a ti a ni. (TP 2:10)

Paula Kristiante tiduhdah tu chu Krista tan a myrtar a, a nun a inlet chiang hle. Mi bawlhhlawh chu mi thianghlim a lo ni a, chhip atanga ke ler thlenga pan hnai lain a bawm khah chu Isua thisen chuan a tle ngfai zo ta a; khawvel mi chu van mi a lo ni a, a nun a bingbilet tawp a ni ber mai. Kristian dik tak chu nun inthlak danglam, thim ata eng a lut: thihna ata nunna a lut, nun bingbilet chu a ni. Kristiante hian kan taksa hi ka thunun zi tur a ni a, paula ang hian setana hmaa kun kai lo turin kan taksa hi kan tichhel ang a; pathian bawih a awm turin kan thunun tur ani. Bingbilet rawngbawlna aiin rawngbawlna bingbilet hi a hlauhawm zawk a, taksa insawizawi aiin Pathiangaihsak hi kawng engkimah a sawt zawk bawh. Tisa thiltih te thlarau a tih hlum hi ringtu puitlingte nun da a ni tih hriat hi thanlen zelna tura thil tul tak a ni.

Aw, dawnglamna mak tak,
Tunah a lo thleng ta;
Lal Isua a lo kal chinah,
Lawmna luipui ka thinlungah a lo luang a;
Lal Isua a lo kal chinah.

HRIATRENGNA

MAJOR HRANGNGURA, tum hnih lai Editor leh Centenary Press incharge ni a min lo ho thin tawhtu niin, sulhnu tam tak min hnutchhiah a, amah avangin tun hun te pawh hi thleng thei kan ni a, a hun lo taka vankohna chhanga min lo kalsan ta mai hi keini Editorial Department chuan kan ui takzetin kan hrereng a. A nupui leh a fanau te tan Sipai zawng zawngte lo tawngtai turin kan han ngen che u a ni e.



TUI BAPTISMA HI A TANGKAI EM?

*(He Article hi Maj.Hrangngura kutchhuak hnuhning ber,
Ni 10 Feb 2011 a Gilgal Corps chanchinbu a chhuah
atan a ziah a ni - Editor)*



- Maj. Hrangngura, THQ.

Chhandamna Sipai Pawla nausen hlan, naupang sipai ni a seilian ka ni a. Corps Cadet zira tui Baptisma changlo, thlarauva piangthar ka ni. Kohhran dang naupang, tui baptist changa piangthar te nen landanah danglamna kan nei ka hre lo. Keimah ang bawkin, Sipai Pawl enkawla seilian te chu tui baptist chang lova rawngbawltu tangkai tak in ni ang tih ka ring a. Chutih lai chuan, kan bul hnaia kohhran liante hian, tui baptisma hi an hman avangin, sipaite zingah pawh hian tui baptisma hian awmze nei a ngai ru tlat kan awm angem tih hi ka ngaihtuah fo thin. Mahse tui baptisma-ah hian engmah hriatna danglam emaw, hmuh belh tur emaw, a awm lova, thlarau thianghlim baptisma-ah erawh hriat tur leh nun chhuahpui tur a awm tih ka sawi duh a ni.

Sipai Pawla tangkai taka tualchhunga rawng kan bawl laiin, loh theih lohna avangin Chhandamna Sipai Pawl awmlahna hmunah kan awm ta a. Tichuan, kohhran pakhatat kan inkhawm a. Chu kohhran chuan, naupang leh thalai zinga rawngbawltu a tan min lakluh an duh avangin baptisma chantir min duh a. Kei chuan, 'piangthar tawh ka nih avangin hman nghal mai theih ka nih thu' ka sawi a, mahse baptisma ka chan loh chuan upate chuan min pawm thei lova, rawngbawl tura Pathian leh kohhran in min mamawhna chu ka hnial thei ta lova, tichuan baptisma chan chu ka titlu ta a. Puitlin tawh hnu leh rawngbawl tur bika tui baptisma chang tur ka nih avangin naupang dangte chen nut hmain a hmasa ber atan tuifimah ngei min chantir an duh a. Pastor-in ka lu a han dawm veleh ka tawngtai nghal a, "Lalpa, he tui baptisma-ah hian hriat tur a awm a nih chuan min hriattir ang che" ka ti a. Chawhnu inkhawmah chuan upaten

sacrament an sem leh a, "Lalpa, he sacrament-ah hian hriat tur a awm a nih chuan, min hriattir ang che" tiin ka tawngtai leh a. Baptisma ka chan lai leh sacrament ka ei laiin thil dang engmah hriat tur a awm lo, Lalpan min hriattir chu, "Lunglei High School building-a i piantharna bak kha i hnenah inpuanna dang ka nei lo" tih hi a ni.

Tichuan chu kohhran ah chuan, kohhran upate nen Camping leh crusade nikhuain counselling-ah khan tangho thin a. Chutah mite kan hrilh ber chu, "I inkhawm te, thawhlawm thawh that te leh baptisma chanin a chhandam lo che a, Lal Isua i rin chauhvin a chhandam thei che a ni" kan ti a, mi tam takin chhandamna an lo chang ta thin a ni.

Chu kohhran a kum 7 zet ka awm hnu chuan, Aizawl a kan hotuten Sipai Pawl din ila an ti a, tichuan mi 70 zet te nen kan din ho ta a, chu kohhran chu ka chhuahsan ta a ni. Kohhran ka chhuahsan tuk chuan kohhran Upa camping/crusade a ka counsellor pui chu a lo leng a, "Ngura baptisma neilo kohhran a i awm chuan vanramah kan in hmu dawn lo, a pawl em mai" tiin min ui thu a rawn sawi a. Kei chuan "E! ka pu counsellor a kan tan ho lai khan i baptisma chan in a chhanhim lo che kan tih thin kha le, vanah chuan kan in hmu ngei ang" ka ti a. Kohhran lian te hian, baptisma hian chhungril lam thatna leh chhandamna a pe thei lo tih an zirtir mek lai hian, chhandamna pe thei ang hrim in an in zirtir a, mahse an rin dan leh an zirtirna hi an ring lo a ni. Baptisma chang tawh ngei kei hian thlarau thianghlim baptisma chauh lo hi chu tangkai na a nei lo tih hi ka puang a ni.



- Major K. Lalrinawma
Supply Officer, T.H.Q.

Jerusalem tobul leh tih chhiat a nih dan:

A tirah chuan Jerusalem hi Kanan hnam chi khat, Jebus ho luah a ni a, Tuipui thi hmar thlang lam a khua a ni. B.C 3,500 vel khan khaw te takte niin, hmasang Aigupta ho chuan 'Salem' tiin an sawi baw k phin. B.C 1,010 – 1,000 vel lai khan, Lal David'an he khua hi a la a, Israel khawpui thar atan a din a, chuvangin 'Davida khawpui' tih a ni baw k \hin.

Jerusalem khawpui chu ral hlauhawm lakah an him theih nan kulh bang chhah tak leh sang takin an hung chhuak vek a, Davida fapa Solomon-a chuan khawpui a zauh vak mai a, khawchhak lamah Lalpa tan Temple a sak hnu phei chuan nasa takin he khawpui hi a lo thang ta vak mai a ni. Hun lokal zelah erawh chuan mipuite an inthlahdahna avangin Pathian lam an hawi tha ta lova, Pathian pawhin hawisanin khawkheng rapthlak tak hmangin a hrem ta a ni. B.C 586 ah Babulon hovin rawn bein, khawpui kulh bang hungna leh kawngkhar te an ti chhia a, a chhunga Temple pawh tichhiain Juda mi tam tak sal ah an hruai haw ta a ni.

Temple leh Jerusalem kulh siam thatna :

B.C. 538 ah Persia miten Babulon ho chu rawn hnehin, Juda saltang te chu an chhhuah tir ta vek mai a, saltang kir leh te chuan Temple chu sak that tul hlein an hria a, amaherawhchu mahni in leh lo din ngheh phawt an duh avangin, kum18 chung pawhin Temple chu an siam tha thei lova, an pamtul ta der mai a ni. Chuvangin Jerubbabel-a hnenah, "Chakna nilovin, Thiltitheihna ni hek lovin, Ka Thlarau zawkin le" tih chu Pathian Temple sak puitlin theihna kawng awm chhun a nih zia hriattirin an lo awm ta.

B.C 445-ah Persia Lal Artexeres-a hnuai hnthawk, khawtlang phatna leh ram rorelna siam phat duh mi, Juda hnam tlukchhiatna leh hmuhsitna tih reh

duh mi Nehemia chuan, kulh hungna leh kawngkhar te a chhe nasa tih hria in, sal tang kir leh te zawng zawng chu hmelma laka an him theih nan leh Pathian biakna dik an kalpui theih nan, Jerusalem kulh bang chhia chu din thar pui leh turin mi thahnem ngaite a sawm khawm a, "I tho ang u khai, I din teh tak ang u", tiin sal tang kir leh te zingah a tlangau ta a, tichuan an kut tichakin, hnathawk turin an tangruai ta a, hmuhsitna leh dodalna tamtak karah kulh bang chhia te chu an siam tha leh ta a ni.

Din thar leh kan tulna : Kan nu leh pa hmasa (Eve-i leh Adam-a) te chu Bumtu leh Thlemtu chuan Eden huan atangin salah a hruai chhuak a, B.C. 700 velah Pathian angchhuga hruaikir an nih lehna dan tur puanchhuah chu, B.C 34 velah atak ram lo thlengin Krista thisen hlu tak hmangin Pathian thilungah thiamchang leh fa nihna pek kan lo ni leh ta. Chumi avang chuan, Pathian chenna In kan ni a, Chhandamna banga hung tlat kan lo ni ta.

Mihring te kan inthlahdahna avangin nasa takin tihchhiat kan lo ni leh thin a, keimahni a chhandamna kulh bang leh kawngkhar te pawh hi sualin a ti chhe leh fo thina, Thlarau bo man thei lovin len pawp, len chat pheuh pheuh hi a lo awm fo thin. Chu tak chu siam tha leh turin kan tha tih chak a tul a, lei lam a thil awm ah te kan rilru dah lovin, chunglam thlir tlat mi kan nih a tul thin. Zu leh ruihtheih thil bansan in, nawm chenna leh dik lo tak a sex hmanna bansan ila, sum ngainat lutukna tlansanin dawngdahna chhang paih ila, Rinawmna leh Felna kawngah kal a hun ta. Pathian duhdan tipuitling tura thlarau bote Krista ke bula hruai thleng turin, keimahni theuh ah hian dinthar leh kan tulna hi kawng tam tak a awm thei ngei ang. Mimal leh chhungkua ah sipai dan leh kohran kalphung siam that kan tulna apiangah Pathian lal ram chu i Din leh ang u.

“KUM ZA LAMTLUANG” THLIR NA

- RHC Lalliansanga YPSM
Lungphunlian Corps

Ka rual awh na thin em em leh ka lo nghahhlelh ve em em; ‘Kum 100 lamtluang’ lehkhabu kan nei ta hi a lawmawm a. A buatsaihtu thawhrimna te a fakawm ka ti khawp mai. Ziak a chiang taka chhiar zui leh tura dahthat kan uar loh zia ti lang tu lehkhabu rotling hi m,alsawm in awm mawlh sela. Chiang takin bih in zir chiang lo mah ila, a chhunzawmna ziah leh kawng ah uluk leh fimkhur tur atan diklo leh fiah lo lai ni a ka hriat ve te (thenkhat chauh) ka han tarlang a. Sawiselna lam nilovin thil tha zawk duhna vang a ni e.

1. Phek 11-na a SA lunglu tih a thlak awm na a ahnuai zawk ah hian - Thiltlang Lal thanzama Sailo hi Mizo Lal zinga Sipai pawl a inpe hmasa ber, September 7.6.1931 (September nge June ni aw) tih a ni a. A bul lawk ah Tlangpui Lal, Lalthima sailo chu Mizoram lal zinga Sipai Pawl a inpe hmasa ber a ni a, ni 6.3.1922 ah a in pe tih a ni leh si a. Inpek hun rual si lo inpe hmasa ber pahnih an awm hi hriatthiam a har deuh.

2. Nau hnuchham enkawl dan hi thu in ang deuh siin vawi 2 (phek 63 leh 90) ziah ani a, sawi nawn leh theih loh a awm rual in hun leh hmun ka lo ren deuh aniang, ka mit a ti kham hman tep.

3. Kan territory ah hian ka hriat sual loh chuan major Kapliana hi pahnih an awm niin a lang a. An hming sawi dan ah hian hriat hran har deuhin sawi pawlh a ni a., hemi kawng ah hian tun a ‘active officer’ hming inang deuh te ah pawh kal dan fiah deuh zawk neih that zia a lang.

4. Tin, Coprs ding hmasa ho zingah hian Lungpho Corps hi vawi thum ngawt tarlan a ni a, a ziak a in an tho avangin hei phei hi chu fimkhur tawh loh vang a ang lek lek.

5. Officer Training tum 30-na a training te hming

ziah lanna a SI.no 8-na Lt. Rahel Laldusaki chu Lt. Lalhriatpua nupui tih hi tih sual a nih hmeh.

6. Training tum 33-na (phek 143) te hming a SI.no 8-na pawh hi an hming Lt. Ramthanga tih hi tih sual a ang bawh.

7. Training tum 39-na te training hunlai hian rank kalphung tih danglam anih thu sawi lan a ni lo tlat mai a. Training chhuak te rank ah pawh Lieutenant tih dah ani lova, hemi hunlai hian training chhuak te kha Captain rank pek an ni a, hei hi hmeh leh tihsual a nih hmeh bawh.

8. Phek 100-na a training tum 40-na a chhuak leh an awmna hmasa ah hian SI.no 5-na pawh hi hliappui Corps nilovin S.Khawbung Corps (?) a ni zawk in ka hria.

9. Phek 239-na a kan sikul atanga zir chhuak pahnih tarlan a pahnihna zawk Mapuia S/o H.Lalenmawia tih tur a nih hmeh.

Heng ka hna tarlan te hi a phek tawp lam a tihdikna siam a tel si lo, tih sual nia ka hriat te anni a. Chik taka chhiar phei chuan (mithiam deuh tan phei chuan) a dang pawh la awm thei a ni a. Engpawhnise hetiang lehkhabu tha leh rotling buatsaihtu, retired officer tha tak kan nei hi kan vannei a. Ziak a thil dahthat thlap thlap uar erawh kan mamawh hle in a lang. A hunlai a chiang tak hi a hnu ah ziak a en tur a awm loh chuan a chiang leh lo mai thin tih hria ang u. Thalai leh hmeichhe din kum mumal pawh hriat chian a ni lo tlat mai te hi a zia lo deuh e. Thangthar te chuan Corps, Division, THQ, Society, SAY, HL leh YP te, Corps Cadet leh board peng neuh neuh thlengin record bu mumal tak nei vek ila, kan rawngbawlna leh chhinchhiah tul te kim leh fel takin chhinchhiah i uar hram hram ang u. Tun hi nakin atan a ni si a. THANGTHAR te min dem lohna tur a ni.

REMNA SIPAI

- H Zadinga CS
Khatla Coprs, Aizawl

Bible-a Pathianmite hmingput tem tak kan hmuh zingah, Sipaiho tih hi hman tam ber lawr lak a ni. New Bible Dictionary chhut dan chuan vawi 830 hman a ni. Sipai tih dawina thumal 5 lai hman a ni a, chung zingah chuan, Force (Hebrai-Layil) tih hi tuntuma kanhman ber hi chu a ni. he thumal hian a kawh tak chu, Thahrui chak, tih a ni. Chuvangin, Pathian chakna thahrui hmanga rremna hnathawh hmanrua atan Salvation Army-te hi Pathian in a din leh hman kan nihzia hria ila; kan tih awm leh tih loh chite kan hre thei ang, Khawvel rem hrang hrangah hian, buaina a chhuak tam hle thin. A tul atihna hminah chuan, UNO hian remna siamtu Sipai a tir thin a ni. Mawl zual deuhna hmunah cchuan, remna siam tur a lo kalte chu an lo beilet ta mai thin. Thil awmzia an hriat chian hnuah chuan, an thu chu an zawm ve zel bawk.

Kristian khawvelah pawh hian, Kohhran pawl hrang kan tamin, inpuhmawhna kannei tam hle mai. Min neitu Isua Krista pawh kan ti beidawng hle ang. Ringlotute, sakhaw dang betute pawhin min ngaihsan theih lohna pawh a ni. Hetiang boruak chiri tak karah hian, Salvation Army te hi, Remna Sipai atan, Pathianin a din a ni, tih hi rin tur a ni (II Korinth 5:18)

Kan Lalpa Isua Kristan, a mite awmdan a duh leh a tawngtaina chu INPUMKHATNA a ni. (Johana 17:11, 20-23) Inpumkhatna chu, khawvelin Pathian tak a ni tih an hriattheihna tur a nih thu a sawi bawk. Chu inpumkhatna chu, Isua Kristaah, thlarau lam inoumkhatna a ni (Galatia 3:28). Chu thlarau inpumkhatna chu vawng tlat turin, Paula pawhin min ngen a ni (Ephesi 4:1-6)

Kristian Kohhran chanchinah hian, inlungual lohna hrichhia hian min pawlh buai reng a ni tih kan hmu. Kohhran a lo tiah tirh lai khan, Juda ringtute vvhuan, Jentail ringtharte chu an Juda sakhaw hmandan, zawm ve turin an phut tlat a. Inhnialna a lo chhuak ta a. Jerusa-lem-ah inkhawmpui an koh phah ta hial a ni. Nasa taka an inhnial hnuah, akip akawia zawm chu tul lovah an dah thei ta hram a ni (Tirkhohte Thiltih 15:11-35) a hnuah, Jentail Kohhrante zingah a chidang deuh in a lo chhuak

leh bawk. Rawngbawltu, anmahni Pathian thu zirtirtute mizia leh an Pathian thu kalpui dan ngainat zawng inan a zilhau a, tui bapismaa a dinhmunte sawifiahin, serh leh sang, puithuna kawnga hre dik, hre ril, zawm dik intihna, thufing atih maite chu, Krista Kraws engmah lovah chantir theitu anih zia a hrih a ni (I Korinth 1:10-17)

Tunlai hunah pawh heng hrichhia bawk hi, Kristiante min hawlh buaitu a la ni ta reng mai. Sakhaw hmandana, serh leh sang puithuna (Rites&Rituals) ah, mahni pawl hmandan sawi pawvawha, midangte hmandan chu dak deuh leh tling tawk lova puhin, Kohhran dik a nih inchuh reng rengin kan hmanhlel hlawm a nih hi. Dante chu tibawng tur nilova, tifamkim tur a nih thu, Isuan a sawi (Mathaia 5:17) Dan thar min pek a tum thu min hrih thung, Kei zawng nun an neih nan tam taka an neih nan ka lo kal a ni, a ti zawk a ni (Johana 10:10) He nun thar hian, Juda emaw, jentail sakhaw hmandan a huap vek a ni. Dante hi kan thiamchan nana min thabattu a ni lova, kan thianchanna chu, Isua Kraws hnathawh chu rinnaa, Khawngaihna kan dawn a ni. Thiamchan nana, dante hman tum emaw, zirtir emaw chu, Krista nena in mihranna a ni zawk (Galatia 5:4). Dante chu thil tangkai lo der chu a ni lo, Krista lama min kaihruaitu a ni (Galatia 3:24). Tisa lama Krista hriatna (II Korinth 5:16), Krista hriatna thubul.... thiltih thi a ni (Hebrai 6:1,2). Bapisma hmun kaht, Johana'n a lo sawilawk ngei, Thlarau Thianghlim leh Mei bapisma, Penticost niin an lo chang ta a. Tisa lamah inang lo tak tak an nihzia hriain, mak an tih kahwpin an lo pumkaht ta a, an lo danglamna an inkawh sak ta hauh lo (TIRKHOHTE THILTIH 2:1-11)

Kristian Kohhran tam zawkin serh leh sanga an hman, tui bapisma leh Lalpa zanriah (sacrament) te chu thlarau thianghlim tin nunna tel lova, hman anih avangin, inhnialna fun ber leh sualin min hawlh buai nana a hman a ni mek a ni. Thenkhat urhsun taka an hman laiin, thenkhatin, milembiakna chi kahtah an lo puh sak mek bawk. Salvation Army-te erawh chuan, miin uluk taka Pathian oawlina thianghlim (holy communion) atan an

hmang a nih chuan, kan tawmpui thlap a, midangin thutak hliahtu atana atan hlah avanga an hman loh pawh dik kantihpui. Serh leh sang anga hmang lova, Pathian biakna hmanrua hlu tak tak kan neihte tangkai taka hmang chung, thlarau lam inpumkhatna dipuia zirtir turin remchang zawka ngaih avanga, kan hmang ve lo hi a fuh thlawt a ni. Inhnialna atthlak kan pumpelha, a tha hle a ni.

William Booth-a chuan "Kohhran pawl dang din ka tum lo, Kohhran pawl am tawh, ka duh ber chu, Sipai rual 'Armies' din a ni"

a ti a. Ziaktu ropui tak pakhat chuan, Kohhran pawl hrang hrangte nihphung dik tak zir chiangin "Salvation Army hi Catholic an ni lova, protetant pawh an ni chuang lo, Army an ni" a lo ti ve bawk. Hetianga, kohhran pawl dangte puhmawhna nei lo va, a thawhpui theih vek avang hian", William Booth-a Army hliapzar hnuaiha chuan, Kohhran pawl tin an zalen vek. Min hrechiangtute chuan kan rawngbawlna min hlut saka, an thawhhlawk hle ani. Keini pawhin kan batah ngaiin, lawmthu sawina atan, chawimawina "Order of Distinguist Auxilliary Services"

siamin mi tam tak hlan an ni tawh.

Keinin tumah thinhrik lo mah ila, min ngainep a, min aihal tlattu erawh a bo chuang lo. Chutiang mi kan lo tawk palh a nih pawhin, thuhnuai rawlh takin kan rinna thutak chu hrilha, inhnialna pawtawh erawh neih pui loha ngawihsana, thatnaa hneh leh turin tawngtai pui maitur kan ni. Thu tak takah cchuan, tuman min thinhrik lem lo pawhin a lang. "Kan pawl/Kohhran tih lovah chuan, Salvation Army tha ka ti ber" an ti deuh vek mai. "Remna siamtute chu an eng a thawl e, Pathian faa vuahih an la awm dawn si a" (Mathaia 5:9)

LAWMTHU SAWINA

- *SL.Singson. Lalpani Corps.*

A hmasain chhiartu sipai zawng zawng te Pathian hmingin chibai ka han buka che u. Pathianin Chhandamna sipai pawl hi keimani tan hian alo din reng ni hian ka hria a. Kum 2003 ah Karbi Anglong hnam buaina avangin ral tlanin North Cachar Hill ah kan pem a, chuta tang chuan kum 2004 October thla khan Metnathol ah kan pem leh a. Roman Cotholic kan ni a, Metnathol ah kohhran belh tur bik hrelovin hun engemaw chen kan awm hnuin Reform Presbyterian Church chu kan bel ta a. Hun engemaw chen kan awm hnu chuan, Laldingliana SC leh Vanlaliana ET te chuan an Lehkhabu "Indona tha Sipai" tih chu min chhiar tir a, chuta tang chuan Sipai pawl hi Pathian kohhran ni ngei leh Pathianin kan tan a din liau liau ni a hria in Kum 2005 ah ka in pe ve ta a ni. Tun thleng hian hlim takin kan awm ta.

Ka fapa upa ber hian Mauchar khua ah nupui a nei a, vandaina tawkin an fa chu thlakhat mi lek a nih laiin Home a dah a lo ngai ta a, Maj.Lalhriatpui chutih laia kan DC chuan lainat takin kawng min ngaihtuah pui a, kan harsatnate min hriatpuiin thla nga mi lek a nih laiin

Motherless Babies Home ah min dah sak ta a. Kan hotuten keini aimah a hmangaihin min enkawlsak ta a, kum ruk lai hnuah chuan kan la chhuak ve ta a ni. A nausen buchip lai leh buaipui a ngaih chung zawng min enkawl sakna te hi ka ngaihtuahin ka lawm tak zet zet a. Rulh tur ni sela rulh sen rual a nilo tih ka hria a, lawmthu sawi mai hi ka tih theih awm chhun a nih avangin Sipai Tlangau kaltlangin lawmthu ka han sawi a ni.

Salvation Army ten kan hnathawh hi a ropui ka ti a, a biktakin Home a thawktu Officer leh Hause Mother te inpekna ropui ka ti. Pathianin tam takin malsawm se tih chu ka tawngtaina a ni. Heng zawng zawng te ka ngaihtuah hian Sipai pawl ten kan hnathawh hi a ropui ka tiin Pathianin a din ngei a ni tih ka rilru ah hian a thar reng dawn a ni. Chuvangin kei leh ka chung te hian rinawm taka Sipai pawl nih leh kan theih ang tawka Sipai pawl tan a thahnemngaih hi kan tih theih tawk niin ka hria a. Pathianin kan tan Chhandamna sipai pawl a lo din hi kan lawm tak zet zet a ni. Pathianin Chhandamna Sipai pawl hi malsawmin tithanglian zel rawh se.

CHANCHIN LAWRKHAWMTE

CENTRAL SOUTH DIVISION

1. LENCHIM SOCIETY BIAK IN HAWN A NI :

- Major J.C Lalengmawia
Divisional Secretary

Lenchim Society Sipai leh thian thate thawh khawma sak Rorelna buk (Biak In) chu Ni 5.2.2011 chhun dar 12:00 khan Pathian ropuina leh Krista mamawhtuten Pathian an pawlna atan leh Setana ral beitunge rorelna atan Major Lalhmingliana, Divisional Commander-in a hawng.



He Biak In thar lawmnan hian vawk 3 talh a ni a, member 40 zet chauh ni mahse khawtlangin ruai hi an kil a, Keifang C.O Bial Corps hrang hrang leh Saitual Corps atangte a lo kalin mikhual pawh 100 chuang lai an ni a. Inchung inkhawmah Major Lalzadinga C.O in inkhawmah kaihrui a. KTP zaipawl te, Keifang Corps SAY te, Rulchawm SAY, Saitual SAY ten Pathian fak hla mawi tak an rem a. Lenchim Society chanchin Maj. K. Biakthuama'n a report a. A hungchhung lenglo khawpin mi an thahnem a ni.

Zan lamah Maj. K. Lalzadinga bialtu C.O in thuchah nung tak mai a sawi a. Thianghlim inkhawmah Maj. J.C Lalengmawia D.S-in thu a sawi a. Fakna inkhawmah Capt. Ramropuinghaki DYS-in thu a sawi a. Maj. K. Biakthuama'n mualah thu sawi bawkin zan chhandamna inkhawmah Maj. Lalhmingliana D.C-in thusawina hun a hmang bawka, inhlanna hun siamin mi thahnem tak an inhlanna ni. Inkhawmah apiangin zaipawl leh solo tha tak ngaihthlak thin a ni bawka.

Chhandamna inkhawmah bakhian fellowship hlimawm tak neih a ni a, zanlai dar 12:00 thlengin khamlo tak leh hlim takin hun hman a ni. Sipai tlem hle mahse an inpekna a ropui hle.

2. NEW SERCHHIP CORPS : Pu Hriatrenga Bangalor a awm chuan New Serchhip Corps tan Biak in Dar tha tak mai ` 14,000/- man lai mai a pe a, Sipai te an lawm hle. Ni 3 Feb 2011 khan Home League te bul tumin Spiritual day an hmang a, Pathian thuchah nung tak tak ngaihthlak thlarau thar leh malsawmna thar an dawng a, zawng chhang tlak an ti hle a. Tlai lam ah Tisa ruai hlim takin an kilho bawka.

3. SPIRITUAL DAY SERCHHIP CORPS : Ni 7 Feb 2011 khan Serchhip Corps Home League ten Spiritual Day hlimawm tak an hmang a, Commanding Officer leh upa ten an hmanpui bawka. Thuchah nung tak tak ngaihthlak a niin tawngtai hona hun tha tak hman a ni a,



Thupui tha tak te hmangin inpawl hona neih a nia, member ten nuam kan tiin zawngchhang tlak kan ti a. Thlarau lamah intuaitharna hun tha tak kan nei. Tlaiah tisa lam ruai tlai taka eiho a ni.

WESTERN DIVISION :

- Major J.C Ngurthanzauva
Divisional Youth Secretary

1. PREMAGAR CACHAR AH SIPAI PAWL DIN A NI : Maj.S.Biakliana DC leh Maj.Ngurthanzauva DYS te chuan Premnagar ah mithar 20 chuang lai mai Sipai pawlah an lawm lut a. Sipaia Pawl puanzar an pe nghal bawka.

2. TAWNGTAI KHAWMPUI : A vawikhatna atan Western Division chuan Tawngtai khawmpui Diakkawn Corps ah an hman a. Corps leh Society hrang hrang atangin Prayer ministry member te an kalkhawm tha hle a. Western Division chung a Officer te leh Soldiers of Cross te an kal tha hle baw. He Tawngtai khawmpui ah hian inkhawm vawi 5 neih a ni a, inkhawm apiangin thupui hrang hrang 27 hmaning tawngtai rualna neih thin a ni a. Sermon vawi 5 ngaihtlak a ni baw.

Cadet-ten Pathian fakna hla nung takin an rawn sa thin baw a, Tawngtai rualna neih a nih laiin Pathian fakna hla an lo hlan thin a ni. An zai te hi Pathianin a hman nasa thin hle. Pathianni tlaiah chawngheia tawngtai inkhawm hlawk takin neih a ni baw. Zan chhandamna inkhawmah Ramthim puala fehchhuahna hun hman a ni a. He fehchhuahna hunah hian Jiribam School sakna tur atan thawhlawm khawn a ni a, Rs,13,210/- laimai thawhkhawm a ni baw. Pathian thuchah nung tak tak ngaihtak chuan sipai te hnenah thu a sawi nasa hle mai a, Tawngtai khawmpui hi zawng chhang tlak kan ti hle.

3. BETHEL CORPS, KOLASIB IN KUM 25NA AN LAWMA : Ni 9 February 2011 Khan Silver Jubilee an lawm a. Colonel. Lalngaihawmi Territorial Commander in hmanpuiin Jubilee Dar a vaw hmasa ber a, chumi hnuah midang 24 ten an vaw leh a ni. Biakin chungah lutin T.C in Jubilee puanzar a pawtpharh a, inkhawmna neih zui nghal a ni. Divisional Commander inkhawm a kaihrui a, Bethel Corps chan chin leh Items benglut tak tak te ngaihtlak a nih hnuin Colonel, Lalngaihawmi Territorial Commander in Pathian thuchah nung tak a sawi a. Sipai thahnem tak in hlan tharin malsawmna an dawng a. Jubille Ruai tlai taka eiho a ni baw. Hemi rual hian YP Hall Rs, 6,50,000/- lai senga an sak chu Divisional Commanderin a hawng nghal baw.

4. BILKHAWTHLIR CORPS AH CAMPING NEIH AN NI : Evan.challianthanga Speaker ahmangin Bilkhawthlir Corps ah Camping hlawhtling tak neih a ni a. He Camping a tir Corps Council in a rel dan chuan Camping vawikhat chauh neih tura ruahman a ni. Mahse, Pathian thlarau thianglim hnathawh a lo thleng a, Camp hi chhawng li lai neih a lo ni ta ni. Hemi chung hian Campers mipa 123 leh Hmeichhia 70 an lut a, kohhran dang atangin mi 57 an lut baw a. Heng mite hian an vaiin

Pathian thlarau thianglim siamtharna an dawng vek baw a ni. He Camping ah hian ruihhlo avanga hun rei takten sim in Lalpa lam a hawi a, a va ropui tak em.

Camping pual hian thilpek a lut tha hle mai a, Pi, Thuthlungthari HLS te chungkua chuan Rs, 28,000/- leh Vawk Inch 36 a lian an thawh a baw. Pu, Laldanglovan Vawk Inches 36 a lian a thawh baw a, Pu, Lalzidingan Vawk inches 34 a lian athawh baw a, heng bakah hian chawhmeh sa, sangha, leh thlai dang tam tak an thawh khawm baw. Pawisa faia lut zawng zawng hi Rs,61,669/- a ni. Thilpek dang te pawisa a chantir chuan Rs,88,670/- lai a ni baw. Tunah hian Bilkhawthlir Corps an hlim hle a, Pathian ram thilpekah hma an sawn nasa hle baw. Zing Tawngtai inkhawm pawh mi thahnem tak an kal reng ta mai. Lalpa chu fakin awm rawh se.

CENTRAL NORTH DIVISION

DARLAWN NORTH CO BIAL

- Major P.C Lalduhawma
Commanding Officer

1. C.O.Qtrs. ah Khum 4x6 leh Madress 4x6 pakhat ve ve C.O Bial in siam in lei thar a ni.

2. Darlawn North Corps te chuan an Corps atanga SA Officer Training mek, Cadet Lalhmintana Pocket money atan ` 1,000.00 an pe in, Officer Training College tan ` 1,500.00. an hlan baw.

3. Damdiai ah : Darlawn North Corps chuan ,Central North Division Y.P rawngbawlina pawimawh tak Aizawl Civil Hospital a DAMDIAI tan ` 1,000.00. an hlan.

4. S.A.Y ten hma la : Darlawn North Corps SAY te chuan October 2011 a SAY Congress lo awm tur atan kalve ngei tum in tunlai hian Sum tuakin nasa takin hma an la. Thing Trip hnih ,Quarry ah Lung, rawra a chhut tur Trip thum an la baw a, insakna tur ban khur laiin an inhlawh bawkin, Aizawl atangin insuk sahbawn leh thildang sum chang thei te la in an zuar leh thin a ni.

5. Darlawn North Corps Home League te pawhin H.L Congress a kalve ngei nan tan an la a Alu leh Sangha te zuar in sum tuakna an bei ngawrh hle.

6. **Tanpuina pe** : Darlawn North Corps L.O.M leh SAY te chuan Tv.Lalbuatsaiha damlo kan in Tawngtaina leh tanpuina thilpek, Pawisa an hlan.Buatsaiha hian dt.8.1.2011 khan van kohna a lo chhan tak avangin SAY in Rs.1000.00. Senior Corps in Rs.500.00. in an ral bawk.

7. **Member thar lawm lut** : Major Pc. Lalduhawma.C.O. chuan Sipai pawl a inpe thar Member 32. Chhungkaw sarhi (7) te chu ni 6.2.2011.(Sun) leh ni 13.2.2011 (Sun) khan Darlawn Central Corps ah lawm luhna a nei.Tin, ni 6.2.2011(Sun) ni vek hian Maj.Vanhmunliani C.O in Member thar lawm luhna a nei bawk.Heng mi thar te hi E.F.C.I kohhran atang a rawn lut an ni.

8. **Sunhluchhip Society tlawh** : Ni 23.1.2011 Pathianni hmang khan Maj.Pc.Lalduhawma C.O te nupa leh Local Officer ten Sunhluchhip Society tlawh in rawngbawlna hun tha tak an nei.

9. **Finance Seminar** : Dt.4.2.2011 (Fri) khan Central North Division bul tum in, Darlawn Central Corps ah Nothern Section (Khawruhlian to Senvawn(Manipur) Finance Seminar neih a ni. Seminar hi Maj.Sangchhunga D.C in kaihruaiin, Pu Lalenglawma Accountant DHQ Central North Division hnen atangin Voucher, Receipt, Cash book leh Bank Account vawn dan te zir a ni a, Member ten hlawk thlak an ti hle.C.O Bial ruk (6) atangin Member sawmriat pakhat (81) an kal a ni.

HOME FOR THE BLIND REPORT

- Major Zonunsangi
Incharge Officer
Integrated School & Blind Hostel

Class XI result : Home for the Blind naupangte Lalfakzuala leh Doulallem Neihzial ten St John's Higher Sec.School atangin Pawl sawmpakhat (class XI) tha takin an pass a, kan lawm hle.

Games for Disabled Special Olympic Bharat buatsaihin Diakkawn field-ah neih a ni a, he sports-ah hian Home for the Blind naupangte'n item chi hrang hrangah Gold medal 6, Bronze 2 leh Silver medal 4 an la a ni.

Community Coaches training : Major Zonunsangi, Mr. Sawihmingluna, Home father, Zirtirtute J.Lalthansanga, David Laldawngliana, Zonunsiami te chuan Special Olympic Bharat leh Sports & Youth Affairs Kolasib District hnuaiha ni 1st & 2nd February khan Community Coaches for promotion of Sports & Games for the Disabled Training, BRC Hall, Kolasibah hlawhtling takin an nei a, Certificate mawi tak hlan an ni.

State level Sports for Disabled : Dt. 18th - 21st February khan Ramhlun Sport Complex, Aizawlah State level Sports for Disabled Special Olympic Bharat



leh Sport & Youth Services, Govt. of Mizoram buatsaihin in sports neih leh a ni a, hetah hian Home for the Blind naupangte : Rotlungthara leh Lalawmpuia te tirh an ni a, Javelin, 100m race leh Shotput ah te Gold medal, silver medal te an rawn la a, kan naupangte leh anmahni hruaitute TA/DA min tumsaktu Pi Niharika Rai IAS, Kolasib District

Sports for Disabled : Dt. 3rd & 4th February,2011 khan District

Bawrhshap chungah kan lawm hle.



Ropuinaa kaisangte

1. MAJOR. HRANGNGURA : THQ ah Executive Officer niin Outreach Mission leh Sunday School Secretary leh Territorial Level Prayer Co-ordinator nihna chelh lai mek a ni a. A pa chu Pema a ni a, a nu chu Dartluangi a ni. Kum 1946 January 15 ah Hnahchang (Lunglei Dist) ah a piang a, unau pianpui 4 a nei a ni. A pa in a boralsan



hma avangin a nu hovin an awm a. Harsa tak chungin lehkha a zir chho ve a. Amah hi lehkha thiam thei tak a ni a, chuvangin an makpa K.Lalhneman zir zel turin a duh a, tichuan Thingsai ah leh Lungleiah High School chu a kaltir ta zel a. Amaherawhchu Mizoram a lo buai tak avangin a zirna chu a chhonzawm thei ta lo a ni. Tichuan kum 1968 khan Hnanchang atangin Hnahthial ah an pem lut leh ta a ni.

Kum 14 a nihin Pathianah Piantharna a chang a, tleirawl sual pawh neilovin Pathian rawng a abawl a. Kum 1976 atanga 1979 thlengin Hnahthial Corps thar hawngin Envoy ah a tang a. Hnahthial Corps hi tun thlengin chhim lama Corps tha pawl tak a la ni reng a ni. October 30. 1970 khan Biaksailovi nen an innei a, Pathian malsawmna dawngin fa paruk lai an nei a ni.

Tichuan Salvation Army Officer ni turin kohna adawng a. Kum 1979 ah Officers Training College ah an lut a. An session hming chu "God's Soldiers" tih a ni. Tichuan Ni 11 January 1981 ah Salvation Army Officer atan nemngheh an ni ta a ni.

Appointment an neih tawh te :

1. Commanding Officer Zobawk Corps - 11.1.1981.
2. Incharge Officer. Centenary Press - 13.1.1983.
3. Commanding Officer Saiha Corps - 15.1.1986.

4. Divisional Youth Officer - 15.1.1987.
5. Accountant RHQ - 15.1.1988.
6. Divisional Secretary Central Division - 20.5.1990.
7. C.O.& Extension Officer Shillong - 15.2.1992.
8. Senior Training Officer - 08.1.1996.
9. D.C Manipur Division - 01.10.1996
10. D.C Eastern Division - 01.5.2000.
11. D.C Southern Division - 01.4.2001.
12. Editor, Centenary Press - 01.5.2002.
- 13 HRD Secretary THQ - 01.4.2005
14. D.C Midland Division - 15.5.2006.
15. Outreach Mission & Sunday School Secretary and Prayer Coordinator - 01.5.2009.

A nat dan tlangpui : Hun engemaw chen atang khan zunthlum leh thisen sang a lo nei tawh a, damdawi a inenkawl reng a ni a. Tun hnai deuh hian tlema insawiselna deuh chu nei ve mahsela, nitin a Office hna chu thulh lovin rim takin a thawk reng tho va. A boral ni pawh hian Booth mansion Conference Hall ah THQ a Officer dangte nen Meeting pawimawh tak ah a tel a. Chawhnu lam Dar 2: 00 pm vel khan a nawmsam loh avangin a haw ta a.

A chhungte nen zanriah chaw pawh kilin, chaw eikhaw veleh chuan a thin na ti a. A zunthlum hian a lung a khawih tel tawh avangin chu chu a lo zual niin a lang a. Tuiluma depin theih ang anga bawih sawm a nai a. Civil Hospital-ah tlanphei pui vat niin Doctor-ten theihtawp an chhuah chung pawhin dar 6:30 p.m ah Ropuina ramah a kaisang ta a ni.

2. MAJOR BUALKUNGPUA

*Major J.C Lalengmawia
Divisional Secretary
Central South Division*

Major Bualkungpuia hi Tualte Corps atangin kum 1977 khan Officer ni turin Training College-ah a lut a, an session hming chu 'Joyful Evangelist' a ni a. Ni 14.1.1979 khan Commission a ni a. Commanding Officer niin hengah te hian a awm tawh a ni :

1. Saikawt Corps (Manipur)
2. Moreh Corps
3. Sialhawk Corps
4. Khawzawl Dinthar Corps
5. Hnahlan Corps
6. Ruallung Corps
7. Bukpui Corps
8. Tuidam Corps
9. Phuldungsei Corps (Tripura)
10. Lungpho Corps

A awmna apiangah thahnemngai taka thawk thin a ni a, hotuten kal tura an tihna apiangah lungawi tak leh thuawih taka kal thin a ni. Tuna a awmna Corps Lungpho-ah pawh hian thahnemngai taka thawkin visitation a neih pawhin kohhran dangte pawh tlawh tel zel thin a ni a. Biak in hmu ngailote a vei em em a, an inkhawm theih nan thahnemngai taka thawkin an hna thawh duhzawng te pawh thawhpui thin in, tun kum 2011 ah phei chuan a thutchilh Corps-ah phei chuan member upa chak tawh loh avanga Biak In kal thei tawhlo tih loh chu Thianghlim inkhawmah chuan an kim thap thap thin a ni.

Major hi rualpawl thiam tak a ni a, a bik takin mi langsar leh khawsa thei te aiin mi hnuaihngung leh mi harsate ngaihsaktu a ni tih chu khawtlang hruaitute sawi dan a ni.

Hetianga thahnemngai taka Pathian leh Sipai Pawl tana a thawh lai hian ni 6.2.2011 Thianghlim inkhawm leh Chhandam Inkhawm te hlim taka inkhawmin, Chhandamna inkhawm banah khawhar inah



te an nupa in an kal a, zan laia a tho chu bual inah a kal a, a tlu thawm hria in a nupui a harh a, a fate kaithovin an han en a, biak tur a lo awm tawh lova, theihtawp chhuahin bawhsawm nghal mahse biak theih ni tawh lovin Ropuina ramah min lo kalsan ta a ni. A hria apiangte tlan khawmin DHQ lam te pawh hriattir a ni a. D.C, D.S, D.Y.S leh Keifang bialtu C.O te Lenchim Society Biak In hawnga kal ten an hriat veleh a zan a zanin Lungpho an pan nghal a. ni 7.2.2011 zing lam dar 8:00-ah thlengin Chhawrtui Corps atangin Bialtu C.O leh Local Officer te Sumo khat tlatin an kal a, Sialhawk atangin an C.O hovin mi 20 dawn lai an kal bawk a. Tualte Corps atangin a tu leh fate 6 an lo kal bawk a. THQ lam te remchan theih loh avangin DHQ kutah a vui lam chu dah a ni a, hetiang hian a thlahna programme chu hman a ni.

Ni 7.2.2011 chhun dar 12:00 ah in lamah Capt. Ramropuinghaki DYS in hun a hmang a. Chawhnu Dar 1:00-ah Biak Inah inkhawmpui a ni a. Major J.C Lalengmawia D.S-in inkhawm a kaihruai a, Major Lalhmingliana D.C-in thlamuanna thuchah a sawi a. Biak In leh kawt leng lovin mipui an lo kalkhawm a ni. Thlanmual ah pawh mipui thahnem takin thlahliam in, "Lungpho a mi thi thlah liamtu tam ber tum a ni e" an ti hial a ni. Thlanmual-ah hian Lt. Isaak Lalremruatkima C.O Chhawrtui Bial in hun a hmang thung a, ui tak leh thlahlel tak chungin Chatuan rama in hmu leh turin Major chu kan thlahliam tak a ni.

A nupui Major Lalbiaklawmi leh a tu leh fate tan i tawngtaipui zel ang u.

3. PI LALTHANGI, LUNGPHUNLIAN CORPS :
*- Vanlalluaia, CLS
 Lungphunlian Corps
 Central South Division*

Liangailova leh Aibuangi te fa pahnihna niin kum 1938-ah a lo piang a. Kum 1959-ah Salvation Army tlangval ruh tak leh Sipai a tui tak, Tualcheng leh Lungphunlian a Salvation Army dintu zinga mi Zidinga nen an innei a. mizoram buai reh hnu 1972 atangin Lungphunlian Corps bultan tu leh sul sutu niin an nupa in lungrual tak leh phur takin rawng an bawl dun a, zai leh lam te, Pathian thu leh thlarau a tui mi an ni.

A pasal Zidinga chu CSM Commission hmasa